

Na osnovu člana 16. stav 4. Zakona o Vladi Zeničko-dobojskog kantona – Prečišćeni tekst („Službene novine Zeničko-dobojskog kantona“, broj 7/10 i 3/23) i člana 7. Odluke o prihvatanju supsidijarnog zaduženja Zeničko-dobojskog kantona po osnovu Ugovora o zajmu između Bosne i Hercegovine i Evropske banke za obnovu i razvoj u svrhu realizacije Projekta „Poboljšanje energetske efikasnosti u JU Kantonalna bolnica Zenica“ („Službene novine Zeničko-dobojskog kantona“ broj: 8/18), na prijedlog Ministarstva zdravstva, Vlada Zeničko-dobojskog kantona, na 105. sjednici, održanoj 14.11.2025. godine, d o n o s i

ZAKLJUČAK

I

Daje se ovlaštenje premijeru Zeničko-dobojskog kantona Neziru Piviću da potpiše Sporazum o realizaciji priključenja JU Kantonalna bolnica Zenica na mrežu prirodnog gasa u okviru Projekta „Poboljšanje energetske efikasnosti u JU Kantonalna bolnica Zenica“.

II

Sporazum iz tačke I. ovog zaključka je sastavni dio zaključka.

III

Zaključak stupa na snagu danom donošenja.

Broj: 02-_____/25

Datum, 14.11.2025. godine

Zenica

PREMIJER

Nezir Pivić

DOSTAVLJENO:

1x Ured premijera,

1x Ministarstvo zdravstva,

1x Ministarstvo finansija,

1x Stručna služba Skupštine, na znanje,

1x a/a.

1. **Zeničko-dobojski kanton**, Kučukovići br. 2, 72 000 Zenica, kojeg zastupa Premijer prof.dr.Nezir Pivić (u daljem tekstu: Kanton),
2. **Grad Zenica**, Trg Bosne i Hercegovine br.6, 72 000 Zenica, kojeg zastupa Gradonačelnik Fuad Kasumović, (u daljem tekstu: Grad),
3. **JU Kantonalna bolnica Zenica**, Crkvice 67, 72 000 Zenica, koju zastupa direktor dr Tarik Zulović (u daljem tekstu: Bolnica), i
4. **JP „ZENICAGAS“ d.o.o. Zenica**, Masarykova 48, Zenica, koju zastupa direktor Sandino Rizvanović, strane potpisnice, zaključuju:

S P O R A Z U M

o realizaciji priključenja JU Kantonalna bolnica Zenica na mrežu prirodnog gasa u okviru Projekta „Poboljšanje energetske efikasnosti u JU Kantonalna bolnica Zenica,,

UVODNE ODREDBE

Član 1.

Strane potpisnice ovog sporazuma, u svrhu realizacije priključenja Bolnice na mrežu prirodnog gasa u okviru Projekta „Poboljšanja energetske efikasnosti u JU Kantonalna bolnica Zenica“, saglasno konstatuju:

- a) da je Projektom **„Poboljšanje energetske efikasnosti u JU Kantonalna bolnica Zenica“** (u daljem tekstu: Projekat) planirano da prirodni gas bude osnovni energent koji će doprinijeti boljoj energetskej efikasnosti energetskog sistema koji koristi Bolnica što će dovesti do smanjenja aerozagađenja u Gradu Zenica i prestanka korištenja uglja kao energenta u Bolnici.
- b) da je za Projekat, na osnovu Ugovora o kreditu potpisanog dana 27.06.2018 godine (u daljem tekstu: Kredit) i Ugovora o grantu potpisanog dana 22.10.2021.godine (u daljem tekstu: Grant), između Evropske banke za obnovu i razvoj (EBRD), Ministarstva finansija i Trezora BiH, odobren kredit Kantonu za finansiranje Projekta u iznosu od 10.000.000 EUR – a (slovima: desetmiliona eura) iz Kredita i 1.000.000 EUR – a (slovima: jedanmilijon eura) iz Granta.
- c) da je u okviru Projekta planirano finansijsko učešće Grada u okviru dva ugovora koji će se odnositi na priključenje Bolnice na gasovodnu mrežu i snadbijevanje prirodnim gasom i to:
 - Infrastrukturni radovi za priključenje Bolnice na gasovodnu mrežu, od čega će u ukupnom utrošku sredstava Grad učestvovati u procentu od 49%,
 - Konsultantske usluge za Infrastrukturne radove za priključenje na gasovodnu mrežu (usluge nadzora) zašto je predviđeno učešće Grada u troškovima u procentu od 16%,
- d) Dinamičkim planom nabavke je za Projekat planiran utrošak sredstava na način da se za svaku isplatu planira 90% sredstava iz Kredita i 10% sredstava iz Granta.
- e) PIU tim, uz saglasnost Upravljačkog odbora projekta i u dogovoru sa Bankom, može odlučiti da sredstva budu utrošena drugom dinamikom (izmjena plana utroška sredstava), uz

poštovanje gore navedenih procenata učešća kreditnih sredstava u infrastrukturnim radovima i konsultantskim uslugama.

- f) ukupna sredstva za realizaciju dijela Projekta iz tačke c) ovog člana, će biti utvrđena nakon evaluacije ponuda u tenderskoj proceduri, a u skladu sa procentualnim učešćem utvrđenim u članu 1. alineja 1) tačka c) ovog Sporazuma.

PREDMET SPORAZUMA

Član 2.

Predmet Sporazuma je regulisanje međusobnih prava i obaveza strana potpisnica Sporazuma u cilju izgradnje dijela distributivne gasne mreže Grada sa priključenjem Bolnice na mrežu prirodnog gasa (u daljem tekstu: dio Projekta), a u skladu sa glavnim projektom priključenja Kantonalne bolnice Zenica na mrežu prirodnog gasa, oznaka projekta 475-ID4/23, IGT doo Sarajevo od 1.8.2023.godine, na osnovu čega je izdato i Rješenje o odobrenju građenja broj UP1-12-19-11194/24 od 2.4.2025.godine, a što obuhvata izgradnju građevine koja se sastoji iz:

- glavne mjerno regulacione stanice (GMRS) sa automatskim odorizacijskim postrojenjem za dodavanje mirisa prirodnom gasu, kapaciteta 20.000 [m³/h];
- priključenje GMRS stanice (vrući priključak) na transportni gasovod BH Gasa na lokaciji blok stanice BH Gasa u naselju Kanal;
- izgradnja dionice primarnog distributivnog gasovoda dužine cca 3,25km;
- izgradnja PRS 4 (prijemno - regulacione stanice) kapaciteta 1.500 [m³/h] u krugu Bolnice;
- izgradnja priključka od PRS 4 do energetskog objekta u krugu Bolnice kapaciteta 8MW zaključno sa mjerenjem.

PRAVA I OBAVEZE POTPISNIKA SPORAZUMA

Član 3.

Za realizaciju dijela Projekta iz člana 2. ovog Sporazuma zadužuje se Prošireni PIU tim, kojeg čine članovi:

- PIU tima Projekta
- Predstavnik Grada
- direktor JP „ZENICAGAS“ d.o.o. Zenica.

Član 4.

Grad se obavezuje da će posredstvom JP „ZENICAGAS“ d.o.o. Zenica obezbjediti Tim za tehničku podršku Proširenom PIU timu za realizaciju dijela Projekta iz člana 2. ovog Sporazuma.

Član 5.

Tendersku proceduru za izbor izvođača radova za Infrastrukturne radove za priključenje Bolnice na gasovodnu mrežu iz člana 1. alineja 1) tačka c), provodi PIU tim projekta.

Član 6.

Projektni zadatak za realizaciju dijela Projekta iz člana 2. ovog Sporazuma, priprema JP „ZENICAGAS“ d.o.o. Zenica u saradnji sa Proširenim PIU timom.

Član 7.

Grad se obavezuje da obezbijedi zemljište za izgradnju građevine iz člana 2. ovog Sporazuma, odnosno da preuzme zemljište i snosi troškove eksproprijacije, izuzev voda na relaciji kotlovnica podstanica.

Član 8.

Grad se obavezuje da će, posredstvom JP „ZENICAGAS“ d.o.o. Zenica, obezbijediti Energetsku saglasnost od operatora transportnog sistema prirodnog gasa u F BiH (privredno društvo BH-Gas d.o.o. Sarajevo) i Ugovor o snadbijevanju gasom sa privrednim društvom Energoinvest d.d. Sarajevo.

Član 9.

Grad se obavezuje da će snositi troškove izmještanja komunalnih instalacija koje se nalaze u okviru zone obuhvata građevinskih parcela na kojima je predviđena izgradnja građevine iz člana 2. ovog Sporazuma.

Član 10.

Zahtjev za izdavanje urbanističke saglasnosti, odobrenja za građenje i odobrenja za upotrebu građevine iz člana 2 ovog Sporazuma, podnosi JP „ZENICAGAS“ d.o.o. Zenica.

Član 11.

Odobrenje za građenje i odobrenje za upotrebu građevine iz člana 2. ovog Sporazuma će izdati nadležni organ na osnovu zahtjeva iz člana 10. ovog Sporazuma.

Član 12.

Nakon završetka radova i pribavljanja upotrebne dozvole, građevina sa pratećom instalacijom iz člana 2. ovog Sporazuma, postaju vlasništvo JP „ZENICAGAS“ d.o.o. Zenica, bez bilo kakvih ograničenja i dodatnih opterećenja.

Grad se obavezuje na pružanje aktivne podrške Bolnici u nastavku ovog kao i sljedećih infrastrukturnih projekata u smislu izdavanja potrebnih dozvola, rješenja i ostale dokumentacije vezano za infrastrukturni razvoj Bolnice.

Član 13.

Grad se obavezuje da će, nakon izgradnje, tehničkog prijema i pribavljanja upotrebne dozvole za građevinu iz člana 2. ovog sporazuma omogućiti, posredstvom JP „ZENICAGAS“ d.o.o. Zenica, priključenje Bolnice na snabdijevanje prirodnim gasom bez bilo kakvih ograničenja ili dodatnih opterećenja.

U slučaju priključka trećih pravnih lica na prijemno-regulacionu stanicu PRS 4, JP „ZENICAGAS“ d.o.o. Zenica se obavezuje obezbijediti stabilnost snadbijevanja KB Zenica kapaciteta 1.500 [m³/h].

Član 14.

Strane potpisnice Sporazuma aktivno će učestvovati u pripremi i realizaciji dijela Projekta iz člana 2. ovog Sporazuma, kao i u pripremi i izdavanju potrebne dokumentacije, saglasnosti i dozvola, u skladu sa svojim nadležnostima i ovlaštenjima.

Član 15.

Strane potpisnice ovog Sporazuma će obezbijediti potpunu posvećenost u realizaciji svih odredbi Sporazuma, maksimalno koristeći postojeće resurse, te pružiti aktivnu podršku i pomoć drugim potpisnicama Sporazuma u cilju njegove realizacije.

PRAĆENJE REALIZACIJE SPORAZUMA

Član 16.

Prošireni PIU tim formiran od predstavnika Grada, Bolnice i JP „ZENICAGAS“ d.o.o. Zenica će koordinirati i pratiti realizaciju Sporazuma.

Član 17.

Prošireni PIU tim će, putem Konsultanta za nadzor koji će pratiti izvođenje radova u realizaciji dijela Projekta iz člana 2. ovog Sporazuma, te uz podršku Tima za tehničku podršku kao nosioca internog nadzora nad kvalitetom izvođenja radova, koordinirati i pratiti realizaciju radova.

TRAJANJE SPORAZUMA

Član 18.

Trajanje ovog Sporazuma je do realizacije kompletnog projekta „Poboljšanja energetske efikasnosti u JU Kantonalna bolnica Zenica“.

RJEŠAVANJE SPOROVA

Član 19.

Sve sporove ili neslaganja, uključujući, ali ne ograničavajući se na bilo koje pitanje ili na spor u vezi s tumačenjem ovog sporazuma, njegove valjanosti ili raskida, te da li su strane svaka pojedinačno izvršile dogovorene obaveze, bit će riješeni kroz pregovore i na miran način.

U slučaju nemogućnosti postizanja mirnog rješenja za rješavanje spora nadležan je Općinski sud u Zenici.

ZAVRŠNE ODREDBE

Član 20.

Izmjene i dopune ovog Sporazuma moguće su samo uz pisanu saglasnost potpisnica Sporazuma, koje će se vršiti putem aneksa.

Na sva pitanja koja nisu regulisana ovim Sporazumom primjenjuju se odredbe Zakona o obligacionim odnosima.

Član 21.

Sporazum stupa na snagu danom potpisivanja.

Član 22.

Ovaj Sporazum sastavljen je u osam (8) istovjetnih primjeraka, po 2 (dva) primjerka za svaku stranu potpisnicu.

Član 23.

U znak prihvatanja prava i obaveza iz ovog Sporazuma, potpisnice Sporazuma ga potpisuju.

ZENIČKO - DOBOJSKI KANTON,

prof.dr.Nezir Pivić, Premijer

Zenica, _____ 2025. godine
Broj: _____

GRAD ZENICA

Fuad Kasumović, Gradonačelnik

Zenica, _____ 2025. godine
Broj: _____

JU KANTONALNA BOLNICA ZENICA

dr Tarik Zulović, Direktor
Zenica, _____ 2025. godine

JP „ZENICAGAS“ d.o.o. Zenica

Sandino Rizvanović, Direktor
Zenica, _____ 2025. godine

Broj: _____

Broj: _____